

隨州志

同治八年重修

同治八年重修

板藏文昌宮



隨州志卷十二

風俗

烈山爲炎帝故宅隨故耕耨之餘氓也宋邢居實賦稱土深厚而無虞其猶有淳悶沕穆之風乎然民俗與世移易葆醕固樸惟司教化者有以導之而水土之剛柔緩急不與焉

隨地土深厚其民勤儉力穡少末務故多土著不外徙土習崇樸學不爲浮誇蒙谷子曰隨俗淳厚類伊洛信然隨井閭沕穆戶游黨塾頗有古道之遺

通志

隨州志

卷十二 風俗

一

男子生朞歲隨謂之抓週諸戚俱至各與兒以繡履綵帽諸物旣長有命字禮卜期燕親友請其中齒長而有德者命之字餘舉酒賀亦古人冠而字之之義也

婚禮不行財以名柬爲定女家答柬如之將娶具綵幣牲牢爲聘厚薄稱其家卜吉然後行納幣禮至期媒導婿親迎奠雁先歸俟於門外設香案牲醴女轎至婿揖轎周迴然後入謂之回車馬婿偕婦登堂拜神夕合巹於室質明婦廟見拜舅姑出所製襪履爲贄其次遍拜諸族黨女子將嫁宗黨治酒食燕女于歸之夕以青綢帕

覆女首胸背懸以小鏡繫以紅帶所以辟不祥也外襲舊衣謂之閨衣取有餘也父母戒女而遣之婦女不親送惟伯叔父及兄弟送至婿家

喪禮多遵文公家禮訃親黨擇日受弔葬之日親黨咸送至墓所惟喪家婦女不出送翼日婦女至墓哭事畢孝子衰麻於靜夜出謝客稽首於其門外不進見其貧不能葬者多釀金以助

祭禮以中元及年節爲重祭及三代以上焚楮謂之冥袱惟春祭移於墓

隨州志

卷十二

風俗

二

立春前一日官迎春於東郊遠近叟孺雜沓呼歡競觀爲樂立春之日官親擊鼓三然後鞭土牛謂之擊春鼓元旦五鼓設香燭陳菓餅酒饌拜神祇序拜尊長畢非至親不面賀惟以紅帖投其門中通名而已三日後往來宴會爲樂

元夕食粉團演燈

正月七日爲人日以七種菜爲羹視是日陰晴以占疾病穀日以陰晴占豐歉前此如初雞二犬之說亦以陰晴驗之

正月十五日作豆糜加油膏其上其夕迎紫姑以卜蠶桑  
並占眾事

上元前三日剪紙爲燈綴以五綵或架綵橫棚於衢而垂  
燈其下或藏詩謎以試推測或聚族爲龍燈或披錦爲  
獅貌咸鼓吹導之自十三夜十四夜爲試燈十五夜爲  
正燈檀板度曲簫鼓相答火樹互角卜夜爲歡至十九  
日方止

社日農家具牲醴祀土神以祈年

花朝日女郎穿耳年十二三以上者留髮及納采問名多

隨州志

卷十二 風俗

三

以是日爲吉

三月三日踏青

清明日插柳枝祭墓作紙幡掛於墓上

五月五日採艾爲人懸門戶上以禳毒氣造龍舟角黍競  
渡以弔三閭大夫又採菖蒲及雄黃滲酒大小俱飲小  
兒則塗雄於額耳以避時氛

伏日多製六一散香薷飲以卻暑

七夕乞巧

中元以冥錢羹酒祀祖先僧道募盂蘭會或以紙作盤膏

以松脂注油燃燈於水陸動以萬計

中秋家設月餅瓜果讌集曰賞月亦彼此相餉

重陽士大夫採茱萸攜酒登高同侶嘯咏亦或製餠相餉  
多就籬落黃花是日造酒

十月朔農家蒸米作糍糕以雄雞祀土神蓋春爲祈穀此  
爲報賽也

臘月八日家以果餅爲粥或亦爲女郎穿耳問名  
二十四日以糖果祀竈神並以芻豆爲竈神飼馬

除夕作麪食具百果祀神換桃符往來辭歲飲團年酒守

隨州志

卷十二 風俗

四

歲間巷皆張燈達旦簫鼓爆竹聲不絕